

繡刻香囊

記定本

目錄

第一齣 家門

第二齣 慶壽

第三齣 講學

第四齣 逼試

第五齣 起程

第六齣 途敘

第七齣 題詩

第八齣 投宿

第九齣 憶子

第十齣 瓊林

第十一齣 看策

第十二齣

分岐

第十三齣

供姑

第十四齣

點將

第十五齣

起兵

第十六齣

榮歸

第十七齣

拾囊

第十八齣

授詔

第十九齣

聞訃

第二十齣

敗兀

第二十一齣

尋兄

第二十二齣

羈虜

第二十三齣

問卜

第二十四齣 設祭

第二十五齣 辭婚

第二十六齣 義釋

第二十七齣 趕散

第二十八齣 寄書

第二十九齣 郵亭

第三十齣 避難

第三十一齣 潛回

第三十二齣 媾媒

第三十三齣 說親

第三十四齣 賞雪

第三十五齣 南歸

第三十六齣 強婚

第三十七齣 得書

第三十八齣 治吏

第三十九齣 祈禱

第四十齣 相會

第四十一齣 酬恩

第四十二齣 褒封

香囊記

明邵璨著

第一齣 家門

〔鷓鴣天〕〔末上〕一曲清歌酒一巡。梨園風月四時新。人生得意須行樂。只恐花飛減卻春。今卽古。假爲眞。從教感起座間人。傳奇莫作尋常看。識義由來可立身。

〔沁園春〕爲臣死忠。爲子死孝。死又何妨。自光嶽氣分。士無全節。觀省名行。有缺綱常。那勢利謀謨。屠沽事業。薄俗偷風。更可傷。怎如那歲寒松柏。耐歷冰霜。閒披汗簡芸牕。謾把前修發否臧。有伯奇孝行。左儒死友。愛兄王覽。罵賊睢陽。孟母賢慈。共姜節義。萬古名垂有耿光。因續取五倫新傳。標記紫香囊。

〔風流子〕蘭陵張氏。甫兄和弟。夙學自天成。方盡子情。強承親命。禮闈一舉。同占魁名。爲忠諫忤。違當道意。邊塞獨監兵。宋室南遷。故園烽火。令妻慈母。兩處

飄零。九成遭遠謫。持臣節十年身陷胡庭。一任契丹威制。不就姻盟。幸遇侍御。捨生代友。得離虎窟。晝錦歸榮。孝友忠貞節義。聲動朝廷。

賢德母慈能教子。

貞烈婦孝不遺親。

王侍御捨生死友。

張狀元仗節忘身。

第二齣 慶壽

〔齊天樂〕〔生上〕讀書無意登廊廟。所志豈求安飽。菽水承歡。蠶鹽樂道。孝悌乃立身之要。〔外上〕青雲夢杳。且就學趨庭。繼晷焚膏。〔合〕兄弟怡怡。向慈闈躬把甘旨調。〔生〕洙泗千年道不傳。淵微至理在遺編。一生未悟誠明了。百行須知孝悌先。〔外〕追往聖。金前賢。鳶飛魚躍性中天。三遷曰佩慈親教。夙夜遑遑更勉旃。〔生〕兄弟入則孝。出則悌。行有餘力。則以學文。今日是母親壽誕。暫輟講習之功。就此花前捧觴稱慶。以敘羣倫之樂。多少是好。〔外〕哥哥。爲此春酒。以介眉壽。況又兄弟既翁。和樂且耽。就當攜取酒肴果饌。一同嫂嫂扶持母親出來。

〔下〕

〔花心動〕〔旦上〕閨夢驚回聽流鶯報道瑣窗春曉〔貼上〕潘鬢垂絲萊綵翻霞
閒身且自逍遙〔外持酒上〕夜來南極祥光照〔合〕親壽日喜遇花朝對碧桃同
把壽樽傾倒〔貼〕老身崔氏之女張門之母良人棄世之時二子尙幼骨肉淒涼家業凋廢教誨
提攜毚勉夙夜如今皆已成立大的孩兒張九成新娶媳婦邵氏貞娘且喜他德性幽閒功容盡善
頗稱清白之風第二的孩兒張九思未遂室家之願且待他溫習經書又作區處正是不求金玉貴
但願子孫賢孩兒你請我出來則甚〔生外跪介〕告覆母親且喜萱花無恙棠棣聯芳雖無王母蟠
桃之宴聊效萊子戲綵之歡況身閒無事當此春和景明之時聊具蔬酒爲母親介壽〔貼〕正是萬
兩黃金未爲寶一家安樂值錢多

〔錦堂月〕〔生〕紅入僊桃青歸御柳鶯啼上林春早簾捲東風羅襟曉寒猶峭
喜僊姑書附青鸞念慈母恩同烏鳥〔合〕風光好但願人景長春醉遊蓬島
〔前腔〕〔外〕難報母氏劬勞親恩罔極只願壽比松喬定省晨昏連枝尙有兄
嫂喜春風棠棣聯芳娛晚景松筠同操〔合前〕

〔前腔〕〔旦〕祈禱親壽彌高。童顏自若。春色故偏萱草。蘭茝生馨。青蓮已見龜巢。喜一門和氣如春。總萬兩黃金非寶。〔合前〕

〔前腔〕〔貼〕垂老素髮飄蕭。朱顏委謝。不復鏡中年少。教子成名。只指望異日封褒。孩兒那時節。喜十年雪案螢囊。換五色金花鸞詔。〔合前〕

〔醉翁子〕〔生〕難效那閔損與曾參子道。且竭力承顏。盡心行孝。〔旦〕論討看古往今來。耿耿名從青史標。〔合〕祈壽考。願鶴算綿綿。福海滔滔。

〔前腔〕〔外〕聽告論爲子事親當顯耀。但親在高堂。怎敢遠遊相拋。〔貼〕從教奮萬里鵬程。莫學區區兒女曹。〔合前〕

〔僥僥令〕〔生〕簪花明繡襖。〔旦〕庭草亂青袍。〔合〕但見兩兩僊童歌金縷。玉女奏雲璈。舞楚腰。

〔前腔〕〔外〕銀缸燃鳳腦。玉碗送羊羔。〔合〕一任銅壺催更箭。明月送清宵。轉斗杓。

〔十二時〕得歡笑處須歡笑。想來日陰晴難料。萬事莫榮懷抱。

〔貼〕春風戲綵醉花前。

〔生〕五福從來壽是先。

〔旦〕直見蟠桃開兩度。

〔外〕卻教龜鶴羨長年。

第三齣 講學

〔窄地錦襠〕〔末上〕三年篤學不窺園。刺股懸梁志亦堅。文章亦可選青錢。問友尋師更勉旃。自家高秀才便是。今年正當大比之年。學中幾個朋友相期講學。不免尋訪則個。

〔水底魚兒〕〔丑上〕坐破寒氈。燈牕苦十年。試官批卷。定爲第一篇。〔末〕詩敍關雎爲首章。這的是第一篇。

〔前腔〕〔淨上〕騏驎爭先。雲程快着鞭。是人欽羨。道咱作狀元。〔末〕英才滿天下。偏你作狀元。〔淨〕小子志量如此。老兄何故當面搶白。〔末〕將軍手裏戟如霜。這便是當面搶白。〔丑〕我便要一個足下白。〔末〕人跡板橋霜。這便是足下白。〔淨〕我要一個身上白。〔末〕滿頭風雪卻回來。這便是身上白。〔丑〕我又要一個白裏白。〔末〕梨花院落溶溶月。這便是白裏白。〔淨〕我要個白

白白。〔末〕譚不過三。今當大比之年。試期將近。且去尋訪幾個朋友。講習學問。多少是好。〔淨〕君子講學。以文會友。以友輔仁。有何不可。

〔駐雲飛〕壯志軒昂。自小遊從翰墨場。文字皆官樣。容貌非凡相。嚟。盧駱與王楊。豈爲吾黨。便遇韓柳歐蘇。未必多謙讓。〔合〕目短曹劉十仞牆。目短曹劉十仞牆。

〔前腔〕〔丑〕學問荒唐。終日陶陶入醉鄉。縱酒情偏蕩。舞劍年方壯。嚟。裘馬任清狂。且耽遊賞。你看雲淡風輕。花外晴絲颺。〔合〕細柳鶯聲出畫牆。細柳鶯聲出畫牆。

〔前腔〕〔末〕綺陌塵香。多士如雲遇試忙。負笈紛來往。問友爭尋訪。嚟。逸足騁康莊。肯留羈鞅。志氣凌霄。才思殊英爽。〔合〕筆陣生風戰堵牆。筆陣生風戰堵牆。

〔前腔〕〔生上〕幼習文章。曾佩軻親教子方。甘旨躬調養。名利誰承望。嚟。鑿壁

且儉光。寸陰休曠。悟卻誠明。義理從條暢。〔合〕免使他年悔面牆。免使他年悔面牆。〔衆相見介淨〕動問尊兄高姓。〔生〕學生姓張。〔淨〕立早弓長。〔生〕子張之張。〔淨〕甚表。〔生〕九成。〔淨〕必有個出處。〔生〕書曰。簫韶九成。鳳凰來儀。〔淨〕承教承教。此位老兄高姓。〔末〕學生姓高。〔淨〕你倒會使乖。我問你高姓。你就說姓高。怎麼不說姓低。〔末〕姓怎麼換得。〔淨〕甚表。〔末〕八座。〔淨〕也有出處。〔末〕史記云。尙書六曹并令僕二人爲八座。〔淨〕將就將就。此位老兄高姓甚表。〔丑〕小子取名時也不會看書。只有一句猜謎詩。〔末〕願聞。〔丑〕道是菊殘猶有兩三枝。〔末〕莫不是鄭五花。〔丑〕正是正是。〔末〕足下高姓。〔淨〕口天。〔末〕姓吳。〔淨〕要倒下口字來。〔末〕那有吞字姓。〔淨〕祖上原姓吳。父親生小子。口大能吞食。說古人曾有田駢。大口做了顯官。以此好識。故改作姓吞了。〔末〕甚表。〔淨〕你是一句詩取名。我小子是三句詩得名。〔末〕願聞。〔淨〕第一句你猜。雪暗逢人不舉杯。〔末〕這是寒夜客來茶當酒。〔淨〕第二句。自小貪杯到白頭。〔末〕這是斷送一生惟有酒。〔淨〕第三句。故人相見且銜杯。〔末〕這是客來謾酌清樽酒。〔淨〕噢你都猜着了。小子平日貪杯。又作得三句好詩。與古人詩相合。就以此爲名。〔末〕三句詩皆有孟字。莫不是吞三孟。〔淨〕正是正

是〔諱介末〕且不要浮言浪語。秀才家相見。講些文字。以求進益也好。〔淨〕正是。都要把本經講一篇。〔丑〕張兄治何經。〔生〕春秋。〔淨〕春秋大義何如。〔生〕春秋以褒貶爲義。屬詞比事。微文隱義。聖人作春秋而亂臣賊子懼。〔淨〕承教。高兄治何經。〔末〕毛詩。〔丑〕大義何如。〔末〕詩以道性情。善者可以感發人之善心。惡者可以懲創人之逸志。〔淨〕承教。鄭兄治何經。〔丑〕小子治禮記。〔末〕大義何如。〔丑〕禮以敬爲主。經天緯地。本之則太一之初。原始要終。體之則人情之大。〔淨〕這經義切體。今日朋友聚會。小子不曾學得禮數。請教道一番。〔丑〕隨諸公要講那一篇。〔末〕內則少儀鄉飲射義。隨意講了一篇。〔丑〕不瞞老兄說。孔子問禮於老聃之時。學生年幼。不曾聞得。諸公若要問我經義。待我去問二戴老先生來。〔末〕又道是當仁不讓於師。〔丑〕吞先生治何經。〔淨〕周易。〔末〕大義何如。〔淨〕若要知大義。就在此坐聽講三五日去。〔末〕那得許多工夫。略說些經旨。〔淨〕我就說伏羲畫八卦。文王重之爲六十四卦。周公作爻辭。孔子作十翼之辭。以後李之才傳於穆修。穆修傳於种放。种放傳於陳搏。陳搏傳於邵康節先生。小子便是邵康節先生親授業的高徒。你怎麼駁問我經義起來。〔末〕且不要誇口。只要解太極兩儀四象之義還我。〔淨〕我那曉得兩儀四象。只把八八

六十四卦斷些吉凶便了。列位若要問前程。就取課錢出來。〔末〕此間張兄是道學之士。休得胡柴。

〔淨〕不敢。

〔阜羅袍〕〔生〕爲學本知趨向。論修身須盡儉讓溫良。求仁未入仲由堂。安貧且臥顏回巷。〔合〕男兒志氣。努力自強。聖賢經傳。潛心會講。奎光直透三千丈。〔前腔〕〔末〕自忝朝廷作養。儘勞形雪案。苦志螢囊。十年燈火困寒牕。一朝姓字題金榜。〔合前〕

〔前腔〕〔淨〕我禮度從來豪放。恃三軍筆掃。五綵胸臆。須教白屋出朝郎。爭誇月斧歸天匠。〔合前〕

〔前腔〕〔丑〕莫笑我狂言誇獎。似神魚失勢。暫困濠梁。禹門一日會飛揚。春風鼓動桃花浪。〔合前〕

〔生〕焚膏繼晷惜三餘。

〔淨〕管領春風到草廬。

〔末〕富貴必從勤苦得。

〔丑〕男兒須讀五車書。

第四齣 逼試

〔花心動〕〔貼上〕清白家聲。嗣箕裘奕世。尙遺勲蔭。兒肄詩書。婦主蘋蘩。何須

囊有贏金。〔旦上〕布荆慚遇梁鴻選。喜賢母慈愛恩深。旦暮間奉侍升堂將祗

〔臨江仙〕〔貼〕曉鏡離鸞羞覩影。孤琴久絕朱絃。只應腸斷柏舟篇。姆儀崇四德。教子慕三遷。〔旦〕

燕爾新婚。諧伉儷。嬌容尙怯芳年。躬持婦道未能全。職供南澗藻。心戀北堂萱。〔貼〕媳婦。自你來到

我家。方纔半月。尙不知我許多心事。〔旦〕婆婆。請說與奴家知道。〔貼〕比初你公公棄世之時。你丈

夫與叔叔皆在孩幼。內外俱無期親之賴。奈家業凋零。朝夕艱窘。勉以詩書教育二子。如今幸得他

卓立成人。但不知前程之事如何。〔旦〕婆婆。不知公公亡過幾年了。

〔瑣窗寒〕〔貼〕守孤幃。幾度淚沾衿。二十年餘喪藁砧。把詩書教子。每苦難禁。

終宵耿耿。何曾安枕。只愁他罄囊虛廩。〔合〕古今惟有孟母與曾參。這般賢孝

堪欽。

〔前腔〕〔旦〕聽雞鳴。妝鏡慵臨。寤寐常懷奉母心。恐西山日近。老景加侵。躬操

井臼還勞織襪。向晨昏怎辭興寢。〔合〕古今惟有孟母與曾參。這般賢孝堪欽。
〔前腔〕〔生外上〕論爲學須惜分陰。瞬息風簷歲月侵。奉慈親強學扇枕溫衾。兒
心祇恐春秋高甚。那戀着腰黃衣錦。〔合〕古今惟有孟母與曾參。這般賢孝堪
欽。〔見貼旦介貼〕孩兒養子不教。父之過。訓道不嚴。師之情。自你父親亡後。訓育之功。都是我一身擔
了。且喜汝等年紀長大。學業有成。但家貧不爲祿仕。是以朝夕憂念。今當大比之年。你兄弟可去求
取功名。多少是好。〔生〕母親自古道。事親孝。故忠可移於君。孩兒於事親之禮。尙未能盡。豈可先於
事君乎。〔外〕母親李密陳情。猶懷烏鳥之私。皇魚出仕。致有風木之恨。語云。父母在。不遠遊。孩兒情
願在膝下。習些孝悌之道。不敢違親遠出。〔貼〕孩兒子路負米。固能盡養親之禮。其後雖有崇爵之
貴。厚祿之享。思欲奉親而不可得。爲終身之恨。我如今年紀高大。生前不得一享封爵之榮。死後有
三牲五鼎之祭。亦必飲恨於九泉之下矣。〔生〕兄弟。母親嚴命再三。你年幼。恐不能任薪水之勞。待
我在家事母。你去求官使了。〔外〕哥哥。少者當任其勞。況哥哥負經濟之才。取青紫如拾芥。兄弟學
未成章。其實難去。〔貼〕你兩個雖年齒大小。皆受十年燈窗之苦。都去一取功名。方顯我教子之功。

〔旦〕官人休要固辭。一則抗親之命。二則不能養親之志。你與叔叔同去。婆婆在堂。奴家常自服勞奉養。不必掛念。〔生〕既然如此。只得順親之志。收拾行李。早晚起程便了。

〔三學士〕只得含情從母命。早辦行李登程。事親未得榮三釜。教子空勞授一經。〔合〕但願錦衣歸定省。忠和孝兩盡情。

〔前腔〕〔外〕暫脫斑衣事遠行。免不得戴月披星。母親倚門他日休思子。仗劍明朝又逐兄。〔合前〕

〔前腔〕〔旦〕親在高堂當暮景。甘旨我自應承。妾身已受蘋蘩託。婦道須傾葵藿誠。〔合前〕

〔前腔〕〔貼〕半世孤燈身共影。孩兒爲汝等多少勞形。若非一舉登科日。怎顯得三遷教子名。〔合前〕

〔貼〕當今黃榜選英才。

〔生〕母命如何敢拒推。

〔外〕正是窗前勤苦學。

〔旦〕須教馬上錦衣回。